

Bisdóm Willemstad

Julianaplein 5 Curaçao, Dutch Caribbean -Tel (599-9) 462-5876

Fax (599-9) 462-7437 • [E-mail: bisdomwstad@gmail.com](mailto:bisdomwstad@gmail.com)

**MENSAHE DI OBISPADO
NA OKASHON DI FIESTA DI SANTA ANA, PATRONA
DI KÒRSOU****26 di yüni 2014****Dirigí na tur hende di bon boluntat**

Rumannan,

Pas di Señor sea ku boso!

Awe nos ta bolbe selebrá e bunita fiesta di Santa Ana i San Joachim, modelo ekselente di mayor i edukadornan ku a komprendé nan tarea den tur sentido di palabra. Ta den kas di Joachim i Ana, e mucha muhé Maria a risibí su edukashon i formashon pa e por ta Mama di Hesus, e Yu di Dios. Ounke ku bida di Joachim i Ana a konosé su difikultatnan esaki no a stroba nan di duna la Bírgen Maria un bon edukashon. Un edukashon ku tabata nesesario pa nan yu por a krese ku e dignidat ku e tabatin derecho riba dje.

Pa e motibu ei nos ke dediká e fiesta di Santa Ana i Santu Joachim, e aña aki na *e tema di edukashon*, un edukashon outéntiko, mirando e “emergensia” ku nos ta pasando den e momentu aktual riba tereno di edukashon.

En bèrdat nos no por keda indiferente i sin preokupá pa formashon di e generashonnan nobo, riba nan kapasidat pa orientá nan bida i di diserní malu for di bon i pa nan biba salú, no solamente den e parti físiko, pero spesialmente spiritual i moral.

Preokupashon di Iglesia katóliko riba edukashon

Na aña 2008 papa emérito Benedikto XVI a skibi un karta dirigí na Diósesis di Roma, riba e tarea urgente di eduká hende hóben. Den e dje, e ta enfatisá ku nos tur (laiko i klero,

mayor i maestronan) mester tin na pechu e personanan ku nos ta stima, na un manera partikular nos mucha i hóbenan, ya ku ta di nan nos komunidad ta dependé den futuro i ku nan mester ta bon formá pa tuma e responsabilidat aki. Edukashon sinembargo nunca tabata un tarea fásil i awendia ta parse ku a bira mas kompliká. Mayornan, maestronan, saserdotenan, religiosonan i tur ku tin responsabilidatnan edukashonal ta konsiente di esaki. Pues Papa ta papia di “problema”, di “emergensia edukashonal”, di “kiebro entre generashonnan” ku ta keda confirmá pa e fayonan ku nos ta topa den nos esfuersonan pa forma hende sano ku por koperá ku otro i duna nan mes bida sentido.

Ora e fundeshi di famia i skol ta tambaliá, e siguridatnan esensial ku ta hasi falta i e nesesidat urgente di balornan fundamental ta keda sintí. Kier men pa nos awe, e yamada pa un edukashon den e forma ei ta bira urgente pa reskatá i trese bèk entre otro: rèspèt, honestidat, integridat, hustisia, konfiabilidad, prudensia.

Mayornan ta preokupá, i tin bes man na kabes pa futuro di nan yunan, mes kos hopi maestro i dosente ta pasando den un eksperiensha doloroso debí na deterioro di kondukta den skol; nos sosiedat kompleto ta preokupá pa nos mucha i hóben ku tin ku enfrentá bida sin un bon preparashon, en korto: tur hende ta pidi pa un mihó edukashon.

Balor di edukashon i ken ta responsabel p’e

Dokumentunan di Iglesia ta definí edukashon komo un introdukshon total i kompleto di un hende den tur aspekto di bida, spesial kon biba den un sosiedat. Promé ku estado i skol, esaki ta responsabilidat di mayornan, algu ku gobièrnunan mester respetá, protehá i promové. (*GE*, 3; *FC*, 37). Papa san Huan Pablo II a papia di edukashon komo un arte di hasi hende bira mas hende, pa e por ta mas, i no solamente pa

poseé mas, i komo konsekuensia, pa medio di loke e tin e por ta un mihó hende den tur sentido di palabra”.

Un derecho humano fundamental pa un demokrasia real

Ta bon kla ku no por tin desaroyo positivo sin edukashon. Pa e motibu ei *Nashonnan Uni* den e *metanan pa desaroyo* den di dos Milenio a deklará ku tur ser humano tin derecho riba edukashon básiko. Kiko esei kier men? Bai skol únikamente pa haña konosementu? Nos ta kombensí ku nos no por tin un demokrasia bibu i real, ora nos edukashon den nos komunidad no ta sostené esei ku formashon di su miembranan den balornan fundamental i den desaroyo di un respèt pa nos dignidat komo hende. Pasobra ora e edukashon faya i nos komunidad ta desekilibrá i sin límite mas, tur kos ta bira posibel, no ta libertat mas sino libertinahe. Komunidad ta bira vulnerabel riba tur tereno: por ehèmpel, ora ta bende dignidat komo ser humano pa sèn, pa kudishi, pa sostené un ideologia ku ta kumpra konsenshi pa e haña siguidornan.

Resultadonan desastroso ora tin falta di edukashon

Nos ta ripará ku falta di edukashon ta rebahá e ideal polítiko, sosial, kultural i spiritual te hiba nos komunidad na un konfrontashon total ku hasta posibilidat di kibra e harmonia di mundu ku nos konosé. Ken por a imaginá su mes ku ta posibel tira un avion matando kasi 300 hende inosente, òf ku un hóben por drenta un skol ku arma di kandela i desahogá su agresividat kontra maestra i alumnonan ku no tin nada di haber ku su problema. Kon chikí nos ta, nos ta i por bira kada bes mas parti di e degenerashon total aki. Pensa numa riba e tiramentu na aeropuerto di Hato di algun dia pasá.

Rumannan, ta bon kla, ku nos no por sigui riba e kaminda ku nos ta awor aki! Nos mester konsentrá riba un renobashon di nos sosiedat, un resosialisashon di esnan ku a kita for di e kaminda korekto, un reedukashon ku ta pone atenshon riba

un edukashon outéntiko i formashon nobo pa nos mucha i hóbennan ku atenshon speshal riba famia.

E negligensia grandi i struktural di edukashon i formashon di nos muchanan ta roba nan di nan posibilidatnan i ta manda nan den e rumbo di konsekuensianan desastroso di aktividat kriminal ku nos ta tende i lesa tur dia den nos medionan di komunikashon: uso di droga, embaraso hubenil (sin porvenir), kondukta totalmente irresponsabel den tráfico. Ta di ken nan a siña tur esaki?

Pa e motibu ei nos ta boga pa un edukashon totalmente ankrá riba balornan moral i étiko ku ehèmpelnan konkreto di tur lider den nos komunidad. Ta e ora ei Kòrsou por kambia. Ta e ora ei nos por yama nos mes pais! Nos problemanan sosial ta asina severo, manera un epidemia di vírus, ku tur kos ta posibel i permití!

Esaki mester keda guiá dor di algun sugerensha òf proposishon práktiko:

Tin límite pa libertat: den e manera di papia, den e manera di aktua. No ta posibel ku nos ta pensa ku nos tin e libertat di pone un lugá di bende kos i pone muzik duru ku ta dañá kalidat di bida di e hendenan ei banda. Djis un ehèmpel.

Tur adulto (mayornan na kas, edukadornan na skol, polis, huesnan...) tin e responsabilidad di kita tur loke intenshonalmente ta pone mucha i hóben den un posishon di ruina nan bida. Esaki nos ta yama prevenshon!

Un kompromiso fuerte di famia pa un bon edukashon di nan yunan. Esaki ta enserá e bon ehèmpel di mayornan, ku mas presensia di mama i tata na kas; konosementu di loke e yu(nan) ta hasi na skol, riba kaya, i ku ken nan ta bai na un manera partikular den oranan di anochi.

Konfiansa den Dios i konfiansa den nos mes pa karga un speransa firme

Rumannan, ku e mensahe aki mi ta hasi un invitashon kaluroso na kada miembro di nos komunidad, kuminsando ku mi mes, pa nos pone nos speransa i konfiansa den Dios. E so por kambia e realidat negativo aki. Nos ta yamá pa bira su aliadonan i bira su kolaboradornan luchando kontra maldat. Su hustisia i misericòrdia so por kura e situashon di violensia ku nos ta den.

Papa Benedikto i Papa Fransisko ta animá nos pa kere firmemente ku e speransa riba Dios nunca no ta un speransa individual, e ta un speransa pa otronan, e speransa no ta isolá nos, pero ta enserá ku nos ta tur ko-siudadanonan, yamá pa edifiká reino di Dios aki na mundu kaba. Mi tin sigur ku nos orashon, pa interseshon di Santa Ana, lo yega serka Dios Tata i ku pronto nos por ta para dilanti un kambio, un porvenir mas alentador i positivo pa nos tur.

Boso sirbidó den Hesus i Maria,
Mgr. Luis A. Secco, SDB
Obispu di Willemstad

Cf. Karta di Papa Benedikto XVI na e Diósesis di Roma riba e tarea urgente di edukashon, 21 yanuari 2008.

Mi ta tuma diferente sita (puntonan) for di e karta menshoná di Papa Benedikto XVI.

Cf. *Ibidem*

Huan Pablo II, *Diskurso na UNESCO, 1980*